

四庫全書

史部

欽定四庫全書

史部

欽定平定臺灣紀畧卷四十一
三

內閣中書_臣沈鵬覆勘

武英殿纂修中書_臣彭元琬

欽定四庫全書

欽定平定臺灣紀略卷四十一

十月二十四日福康安奏言十一日清晨臣見風勢畧平強令放船行未十數里仍被逆風打回至

臺灣情形日來總未據常青柴大紀恒瑞等具奏殊不可解適有自鹿仔港放回船隻即傳船戶蔡順利詢問據供聞得總兵普吉保於九月半前親自帶兵前往諸羅曾密打仗得勝我不能知道等

語據該船戶所言普吉保久已帶兵前往諸羅恒
瑞若由鹽水港併力進攻收復鹿仔草彼此聲勢
聯絡諸羅尚可無虞查諸羅久被圍困屢次救援
皆未得手臣再四酌籌自應令柴大紀仍前固守
與恒瑞普吉保內外應合殺賊解圍似未便輕委
縣城奏入

上命軍機大臣傳諭福康安李侍堯曰海洋風信頂阻
未能尅期開駕正是

上蒼默佑

天妃助靈俾福康安得以等候新兵揚帆同渡未始非
極好機會朕方轉愁為慰福康安惟當益加敬感切
勿因放渡稽遲稍存尤怨也笨港距諸羅聲息相聞
與鹽水港相距三十里兵勢已為聯絡是諸羅鹽水
港兩處俱可無虞且檢查恒瑞前奏鹽水港有賊匪
滋擾係九月初四五兩日情形而普吉保昨日奏到
先復笨港係九月十六日之事是鹽水港一路已壯

聲援常青處自守有餘亦可無慮賊擾至普吉保一路既已得手柴大紀等自可內外應合併力會攻所有前後寄信諭旨俱毋庸給與閱看再普吉保昨日奏到之摺是否由蚶江登岸抑係由廈門轉發何以福康安未經相值李侍堯亦未得有信息著李侍堯將普吉保此次奏摺係由何路馳遞之處便中查明具奏此後軍營奏報均應於遞到何處即由何處迅速轉遞勿得因有此旨拘泥令其轉至廈門以致耽

攔方為妥善至此次福康安發摺時尚在守風待渡
是由廈門至鹿仔港係屬頂風而由臺灣至內地當
係順風何以常青處亦未據有遞到奏報並著李侍
堯一俟常青文報遞到即飭驛站加緊迅速馳遞為要
二十五日未普吉保奏言李化龍於八月二十五
日進港臣隨將北路一帶賊勢及一切設脩防禦
各情形詳細告知而李化龍以曾經出師金川即
欲帶兵前往臣以李化龍甫經到港一切地勢賊

情未能深悉自應在鹿仔港固守堵禦仍將各路
留駐官兵統交經理臣得以長驅可免返顧之虞
其原設各營盤均關緊要仍妥為安設留兵五千
六百餘名責令副將格綢額穆騰額叅將福蘭泰
遊擊裴起鰲張會元陳士份等加意防範所有添
調粵省兵三千名自八月初六二十二至九月初
十日始行陸續抵鹿仔港內尚有兵船一隻配帶
兵丁七十九名係把總鄭廷斌管帶未經進口臣

一面酌帶漳州兵二千名廣東兵二千名又在陳
兵內挑撥曾經打仗者一千五百名併帶領護理
副將遊擊琢靈阿叅將張朝龍遊擊海亮夏承熙
葉有光都司馬元勳等分飭管領查署理番同知
黃嘉訓於事頗為熟悉總理糧務隨營辦理一切
臣分派妥協定期於本月初四日親率各官兵本
擬於東螺西螺一帶進攻緣聞諸羅縣城被賊圍困
事至危急臣即遣妥人密為偵探道路若經由東

螺西螺進攻斗六門賊匪不無設備剿洗恐稽時
日今查笨港離縣城二十餘里離鹽水港三十里
雖係賊匪屯踞若大兵由沿海一帶猝然驟至賊
必喪膽潰亂我兵乘勢進攻既可速解諸羅之危
而於克復笨港後分撥官兵守禦糧餉藥鉛等項
於海道運送更為便益臣一面帶兵相機前進一
面密行知會柴大紀由縣城統兵接應互相堵殺
務期打通道路即可與將軍臣常青等大兵會合

進攻大里杙一帶賊巢

同日李化龍奏言統領粵兵二千名於二十五日

到鹿仔港隨會商普吉保乘此新兵銳氣臣即欲

親帶官兵進剿而普吉保留臣在鹿仔港駐鎮以

固地方臣因署提臣普吉保既係統領閩浙粵官

兵則一切機宜自應聽其調度業經稟請將軍臣

常青叅贊臣恒瑞一俟派有大員前來經理指示

機宜臣即統兵接應分路進剿痛殲渠逆均奏入

上命軍機大臣傳諭福康安普吉保李化龍曰普吉保李化龍二人同係領兵大員當此逆匪滋擾亟須剿捕之時伊二人俱欲帶領官兵親往剿賊均屬奮勉可嘉但普吉保在彼日久於該處地勢賊情較為熟悉伊以李化龍甫到鹿仔港恐未能深悉該處情形令其帶兵駐守普吉保親統官兵督率前進所辦甚是此次普吉保李化龍奏到之摺係九月初四初六等日拜發而普吉保於九月十七日具奏克復笨港

之摺已先行奏到業經降旨將普吉保交部議敘並賞給搬指荷包以示獎勵至李化龍一抵鹿仔港即向普吉保面詢機宜欲親自帶兵進剿其急公勇往之心亦甚可嘉獎李化龍著賞給大荷包一對小荷包二對該鎮倍當奮勉督率留駐官兵悉力堵禦俾普吉保長驅直入可無後顧之憂即日福康安前抵鹿仔港兼有添派之廣西川黔等省兵陸續齊集軍威壯盛尅期進剿正在需人統領李化龍當隨福康

安奮勇殺賊尅期立功自効至普吉保稱若由沿海一帶
猝然前往賊必聞風潰散之處所見尤合機宜不料普
吉保竟能如此現在普吉保已將笨港收復殲戮賊匪
焚燬附近賊莊而該處村莊民人一聞官軍踵至歡聲
動地正可乘勝攻勦昨據該鎮一面咨會柴大紀恒瑞
定期三路夾攻柴大紀恒瑞自必督率將弁兵民內外
應合併力夾攻可期集事著即迅速馳奏

二十六日

庚申

普吉保奏言逆首林爽文率領夥黨

又於二十二二十四等日在元長庄一帶蜂擁前來經臣親督官兵奮力殺退賊衆仍屯踞附近村莊密遣妥人偵探得實即於二十四夜分派官兵鄉勇預為埋伏二十五日黎明賊衆由溪墘厝到雲厝土庫東莊等處前來逼近營盤臣親率官兵奮勇直殺鎗砲打死賊匪甚多遊擊海亮都司馬元勳從白沙墩橫衝賊陣用連環鎗砲打死賊匪一百餘人署副將琢靈阿叅將張朝龍遊擊夏承

熙從無底潭環攻其背署同知黃嘉訓鼓勵鄉勇
從水磨莊堵禦截殺自邠至耒賊衆大潰共計鎗砲
轟斃賊匪數百名奪獲器械賊旗多件文武員弁
甚為奮勇出力兵丁鄉勇亦有陣亡受傷者現在
查明分別賞卹惟是賊匪經大敗之後仍於附近
村莊嘯聚實為可恨必得設法剿洗臣若竟帶兵

丁前進糧道後路最關緊要是以疊稟叅贊將軍

臣恒瑞叅贊提督

臣

崇大紀三路夾攻方易剿洗

淨盡茲於二十五日接准恒瑞來札知鹽水港一帶海口要道賊匪不時出沒現在所帶之兵僅數堵禦必俟續帶府城之兵到日方可前來並接據柴大紀札稱林爽文等賊於本月十五十六兩日復攻諸羅敗陣聞官兵至笨港該賊目帶匪徒數千團聚於大客莊等語是兩處均有難以輕動之勢現在籌度機宜多方密探一俟機有可乘即奮勇前進痛加剿洗又二林地方為鹿仔港沿海一帶

門戶前經藍元枚派撥官兵八百名以資防守旋因續到漳州之兵二千名亦經藍元枚分派二林以備進攻斗六門調遣緣原帶漳州官兵只有遊擊夏承熙守脩宋國興二員實不敷管帶適遊擊葉有光奉督臣李侍堯委令管押哨船來巡查洋面藍元枚見伊係同安人語音與漳州相通且為人遇事奮勉是以飭令同帶漳州官兵駐劄二林即將原駐兵丁八百名撤回鹿仔港九月初九日臣

督率官兵駐劄二林察看形勢實為海口要道且
為我兵糧道後路特令遊擊葉有光帶兵八百名
暫駐二林一面飛咨鎮_臣李化龍將原設之兵來
駐二林更換葉有光之兵俾得前進攻剿茲於九
月二十一日突遇賊匪焚燒大城厝菜菴等庄
來犯二林遊擊率領官兵往前堵禦鎗砲攻擊賊
衆敗退正在燒燬賊佔之揚賢莊舖心仔等處不
意賊匪突從竹圍內衝出繞截後路攪殺一處遊

擊督率官兵奮力衝殺賊匪始行退散陣亡千總
湯國寶把總曾超羣外委沈揚芳兵丁三十三名
照例卹賞

同日李化龍奏言自鎮

臣

普吉保帶領官兵起程

進剿之後即親往各營盤察看地勢情形諄諭將
備加意防範並傳集義民首林湊等訓示獎諭令
其保守村莊協力堵禦第查現在賊匪注意專攻
諸羅正可乘機進擊以分賊勢隨於九月十八日

密令遊擊穆騰額帶領官兵由番仔溝進至大肚溪一帶以作疑兵臣親率遊擊裴起鰲署遊擊陳士份守脩徐大鵬帶領弁兵義民首許伯達等引道由八卦山直抵柴坑仔賊匪蟻聚拒敵即令施放鎗砲賊始漸退隨焚燬草寮二十餘間賊人恃衆竟復擁至臣率領官兵向前戮殺鎗砲打死賊匪百餘人賊即奔逃正欲追殺因見該處竹林叢雜溝圳甚多未便輕進暫且收軍生擒賊匪何華

歐倚二名奪獲鳥鎗刀械賊旗等件二十日親率官兵義民前赴中蔡地方審察地勢偵探賊踪猝遇賊匪數百前來迎敵隨令施放鎗砲打死賊匪十餘人賊始退走二十二日聞大肚溪賊匪出擾莊民_臣隨即帶領官兵義勇前往堵禦施放鎗砲自辰至午打死賊匪約有二百餘名賊匪紛紛潰散奪獲賊旗皮牌長鎗竹鈚挑刀等件義民內陣亡二名加厚卹賞受傷八名給銀兩醫治至賊匪何

華歐倚二名審係賊黨即在軍前正法均奏入

上命軍機大臣傳諭福康安李侍堯普吉保李化龍曰
笨港業經普吉保克復屢敗賊衆連日賊人不敢窺
伺而鹿仔港一路又經李化龍在柴坑仔中藔等處
乘間攻擊奮勇殺賊賊人望風奔潰是官軍聲勢皆
可聯絡已為大振足令賊人膽寒此時福康安自早
得有順風揚帆徑渡前抵鹿仔港正值賊人屢經潰
敗之後福康安惟當乘此好機會督率將弁會合各

路鼓勇直前於初次打仗時即將賊匪痛加殲戮俾賊人聞風喪膽無難一舉掃擒至普吉保在笨港一帶雖屢敗賊衆但據奏賊匪仍在附近村莊嘯聚該鎮帶兵前進其糧餉運道後路最關緊要仍應加意防範又李化龍於柴坑仔中蔡等處乘機進擊以分賊勢固屬奮勇但鹿仔港係沿海重地逼近賊巢李化龍尤須隨處留心實力防守不可但知銳意直前轉致附近賊匪潛出後路滋擾此為最要陣亡千總

湯國寶把總曾超羣外委沈揚芳及兵丁三十三名
俱着咨部優卹

上又諭內閣曰普吉保由鹿仔港進攻督率弁兵奮勇
殺賊既已攻復笨港今復能偵探賊踪預為埋伏令
將弁等從旁衝截賊隊從後環攻賊背前後殺死賊
匪數百餘人奪獲器械等件甚多實為奮勇可嘉普
吉保已經交部議敘着再賞給蟒袍一件以示獎勵
李化龍因普吉保帶兵進攻留駐鹿仔港防守今能

探察賊情乘虛進擊奮勇攻剿殺賊多人奪獲器械賊匪望風奔潰李化龍亦屬奮勇可嘉著交部議敘所有此次普吉保李化龍派出隨同打仗殺賊之文武員弁等均為出力並着查報將軍咨部議敘以示嘉獎

同日孫士毅奏言招募新兵四千名飭令入伍訓練並知會撫臣圖薩布關支糧餉務使各兵技藝嫻熟以收實用萬一軍營現兵不敷搜剿再須添

調

臣

愚似應新舊參用於其中挑選材技出衆者

赴臺剿捕較為得力再查粵東赴臺官兵其子弟
作為餘丁隨往者共一千二百餘人軍營遇有兵
丁缺出足資援補至此外續有應募臣擬仍令各
該營陸續登冊暫緩入伍毋庸一概給以糧餉以
節糜費

同日圖薩布奏言黔兵二千名現分四起行走於
十月初七八九十等日陸續到省立即更換船隻將

應給口糧各項照例給足隨到隨行諭令文武員弁小心護送晝夜趲行沿途俱極安靜並未片刻停留

臣仍移咨惠州提

臣

高璚駐潮督

臣

孫士毅一體

飭令沿途地方文武加緊催趲務期迅速赴閩

同日舒常奏言湖南應脩之兵二千早經照數挑定一面移知提

臣

俞金鰲速赴鎮筴接署鎮篆並

令鎮

臣

尹德禧先赴總路查點帶領以專責成查

原派副將伊當阿曾經出師西路金川其餘將脩

多係曾經出師之員均經飛飭作速起程

臣

赴長

沙會同撫

臣

浦霖督辦一切軍行事宜并分地查

點督催俾各起官兵安靜迅速出境不致稍有延緩所有鎗礮火藥鉛彈等項寬為預備飭派專員解送

同日何裕城奏言川省委員先後押米二十萬石接續到境經該地方官迎護尾催於十月十二日全數出江西境隨飛咨安徽撫

臣

一體飭屬備催

星速前進均奏入報

聞

二十七日

辛酉

常青奏言八月二十七日探得賊目

莊大田復約首逆林爽文之弟林三共糾匪衆欲

來犯郡

臣

一面知會郡城弁員留心防範一面派

撥江寧將軍永慶侍衛烏什哈達總兵梁朝柱等

於二十八日黎明帶領弁兵二千名前往迎擊方

出營盤里許據報賊衆已從中州來犯大營東南

二面並分夥黨約二千人先攻府城大南門小南門外之桶盤棧當經在城之司道等率領民兵施放鎗砲打死賊三十餘人賊即由竹箐深處竄逸其大營東南兩面約有賊五千餘人蜂擁而來臣即親自督率永慶烏什哈達梁朝桂等奮勇進剿賊人對放鎗砲滿漢官兵排開隊伍子母聯環鎗砲疊發併施自辰至午賊人敗逃官軍乘勢追趕剿殺至七八里前抵大溪河邊收兵回營計共斃賊約二百餘人奪獲

大砲二門官兵義民割獻新留髮之首級十一顆
當即獎賞註冊官兵義民並無傷損至前次摺內
聞賊目來投之語彼時因有山猪毛義民首舉人
曾中立差人赴道稟稱賊目許光來囑令民人黃
嵩到堆探問如擒送莊大田得以免罪否隨諭以
不但免罪而且有功等語以後並未有投出之信但
臣具摺時未將賊目姓名各緣由聲敘明悉實屬
疎忽

同日恒瑞奏言李侍堯所派兵三千名尚未到齊現在鹽水港附近村莊俱有賊人屯聚賊中火藥糧食甚多難以前進且於附近左右藏匿明係欲俟官軍前進將後路截斷又賊匪於民人所種糧食十分中抽取二三分其附賊民人驟難解散即安分之民亦多心懷兩端均奏入

上命軍機大臣傳諭福康安常青崇大紀曰前曾有旨以常青自駐守府城以來未能前進尺寸伊究係年

老留在軍營無益而恒瑞年力正壯尚可以資驅策
是以令福康安到彼察看將恒瑞留彼聽候調遣令
常青即行回京今日閱伊二人奏到各摺因思常青
在府城駐守雖未能前進但一切調度尚俱妥協又
聞知諸羅鹽水港兩處被賊滋擾先後派兵接應且
伊在府城亦經屢次與賊打仗是常青雖屬年老尚
能料理軍務且福康安到鹿仔港由北路統兵進剿
其南路及府城一帶亦須有大員駐劄督辦常青在

彼日久於該處情形較為熟悉應仍令其留駐府城督率剿捕至恒瑞在鹽水港被賊攔阻一籌莫展轉於摺內將賊匪情形張大其詞茫無主見似此怯懦無能即留於軍營亦屬無益著福康安於鄂輝到後即傳旨將恒瑞解任令其自備資斧來京候旨其福州將軍員缺即著鄂輝調補令其統領恒瑞原帶弁兵妥力剿捕鹽水港一帶賊匪接應諸羅至常青此次覆奏之摺既得有福康安到彼接辦之信該處兵

民聞之如何踴躍振奮其賊匪聞有大軍將到情形
若何俱應於摺內詳晰聲敘乃並無一字奏及且常
青自經委任不能稍著功績今聞簡派福康安前往
接辦亦應將伊在彼半年毫無出力愧悚難安而於
彼處情形自為熟諳情愿留於該處隨同剿賊以贖
前愆之處於摺內叙及乃亦竟無一語著常青自行
明白回奏恒瑞既知賊人於附近處所潛匿欲圖乘
間邀截正應督率官兵將鹽水港附近左右藏匿賊匪奮

力搜捕以清肘腋豈有坐待之理即如福康安現在
統兵到彼沿途遇有賊匪自即隨處剿殺亦斷無因
慮賊匪潛截後路遂按兵不動乃恒瑞惟知坐守漫
無籌畫伊究竟在彼所辦何事豈竟與賊相持待其
自斃又將欲效魏大斌之到諸羅徒糜廩給耶着福
康安嚴加詰訊據實具奏至常青所奏賊目許光來
囑令民人探問擒送莊大田是否得以免罪一節常青
諭以不但無罪且可有功其措詞尚為得當臺灣賊

匪本屬一時烏合其附從夥黨見逆首尚在負隅抗拒自未必肯將賊首賊目即行擒獻即日大兵雲集四路攻剿賊首等勢窮力蹙退無所歸此等嘯聚匪徒豈真有恩信相結其附賊夥匪一見官兵勢盛首逆指日就擒或希圖自謀生路竟將賊首賊目擒縛獻出乃事理之必有著福康安於進剿時即行廣為曉諭使脅從之徒自相解體彼此猜疑則賊匪烏合之衆可期不攻自散又現在賊匪四出滋擾迫脅村

莊民人抽分糧食村民等畏其戕害自不得不勉強聽從將來福康安統兵進剿於所過地方尤應妥為安撫再前此諭令柴大紀如諸羅守禦力實難支不妨帶兵殺出縣城另圖進取乃係因彼時諸羅被賊滋擾情形較為緊急各路援兵未能即至而柴大紀係提督大員稍有疎虞殊為不值是以曲加軫念今普吉保已帶兵克復笨港與諸羅相距止二十里聲勢聯絡兵氣已振而柴大紀在彼堵禦屢經殺賊是

諸羅保守無虞已逾半載此時豈可轉委之而去且
諸羅義民委之於賊亦甚可憫所有前降諭旨即可
毋庸給與閱看乃常青已差人賁送前往殊屬失之
拘泥但柴大紀素有謀畧固守諸羅已經數月當賊
匪猖獗之時尚能悉力堵禦奮勇殺賊況今賊勢日
衰伊接奉前旨自斷不肯委垂成之功而去惟當倍
加奮勉會剿奏績

二十八日戌徐嗣曾奏言臺灣自用兵以來車運

軍裝夫腳並給發義勇口糧在在需用錢文以致
錢價增昂即內地亦有日增之勢恐將來逐漸增
昂於民用官需均有滯礙不可不急籌調劑閩省
寶福局鼓鑄錢文歲額祇四萬三千餘串僅敷搭
放且雲南買銅轉運稽遲趕緊加鑄亦屬緩不濟急
與督臣商酌擬從鄰省撥濟以平市價但思陸路脚
價浩繁轉滋糜費惟查川米五十萬現由江蘇上海轉
運莫如即於米船內附搭來閩較為妥便仰懇

勅下浙江江蘇撫

臣

每省各脩錢十餘萬串附搭米船

解閩江蘇錢文即於許墅太平等關稅銀內扣撥

歸款浙省錢文即於現撥餉銀內扣抵一併發至

上海轉運所需運費均由江浙二省核銷閩省得

此接濟則制錢各處流通於軍需民用大有裨益

但江浙現在市價情形難以懸擬所請每省十餘

萬之數或仍聽江浙撫

臣

酌量增減毋致此盈彼

絀奏入

上命軍機大臣傳諭李世傑閔鶚元琅玕徐嗣曾曰閩省辦理剿捕事宜一切運送軍裝夫價以及給發口糧需用錢文較多以致錢價昂貴自應鄰省撥濟以平市價但江浙兩省現在錢價是否平減局銅是否敷用若因協撥閩省以致該二省錢價增昂局銅不敷亦多未便著李世傑閔鶚元琅玕即行妥為籌酌如該二省能照數協撥固屬甚善即各備錢十餘萬串解閩否則減半撥濟亦無不可所有協撥錢文即

著附搭米船一併撥至上海轉運閩省備用

二十九日

癸亥李侍堯奏言普吉保往笨港時軍裝

糧餉俱在元長莊大營有賊乘虛來犯經同知黃嘉訓及遊擊夏承熙殺退又九月十二日有虎仔坑賊首陳泮帶領四五千賊夥下山來擾經副將格綢額督率官兵義民奮勇殺退是賊覘知普吉保進兵又思乘虛從後路來襲一則擾普吉保之糧餉一則擾埔心庄營盤以圖牽制則鹿仔港正

需兵接濟而本月十四日風勢已平將軍叅贊及
粵兵俱由大擔放洋如風帆平順不過兩三日即
可抵鹿仔港適川省屯練第一起已於十六日到
蚶是以臣亦即自厦星赴蚶江料理配渡現皆隨
到即登舟配渡又查恒瑞普吉保既已訂期夾攻
普吉保所駐之元長莊離諸羅僅二十餘里恒瑞所
駐之鹽水港離諸羅亦僅四十里兩路齊進計此
時必與柴大紀會合而將軍叅贊巴圖魯侍衛等

及粵兵三千又齊抵鹿仔港川兵隨後繼進黔兵到來臣亦當料理速發奏入

上命軍機大臣傳諭福康安常青李侍堯曰福康安同海蘭察及巴圖魯侍衛章京等於十四日俱由大擔放洋不過兩三日可抵鹿仔港計到彼後今已及旬餘自己督率將弁乘銳進剿至虎仔坑賊首陳泮覘知普吉保進兵又思乘虛潛出繞截甚屬可恨料此等賊匪罪惡貫盈久為天理所不容此時大兵雲集

四路攻圍斷不能苟延殘喘賊匪等肆逆不法罪不容誅其逆首林爽文及莊大田陳泮吳領等必須生擒解京盡法處治方足以洩神人之恨着福康安於統兵進剿時如逆首等膽敢親出抗拒被官兵臨陣殲戮固亦足以伸國法然究不若按名生致處以極刑方可彰憲典而快衆忿福康安務須預為布置設法籌辦俾渠魁首惡悉數生擒更為妥善朕心方愜也副將格綢額於賊首陳泮帶領賊夥下山滋擾時

督率兵民將賊匪殺退甚屬奮勇前因出有溫州鎮
總兵一缺諭令福康安於帶兵出力之副將內如徐
鼎士謝廷選等保舉一員奏明陞補著將格綱額亦
歸入出力副將內一併察看比較何人最為奮勇即
行奏明補用以示鼓勵

欽定平定臺灣紀畧卷四十一

欽定四庫全書

欽定平定臺灣紀略卷四十二

十一月初一日乙未李侍堯奏言臺灣府城九月中

惟十四日有賊在蔦松等處滋擾官兵一到即行
逃遁其餘並未自奉

諭旨准脅從者投誠並遣十萬天兵渡臺勦匪各官刊
刻謄黃布入四鄉南路民人惟恐玉石俱焚自呈
實係良民懇賞給腰牌以為識別者共一百三四

十莊九月十五日又有鳳山縣竿林等莊及粵民
共一萬餘人來郡遞呈將軍常青亦給以腰牌令
其回莊安業莊大田因賊黨漸散將家屬移入大
武壠自領親信數百人在石仔瀨潛伏常青派副
將丁朝雄並臣所遣往勦東港之遊擊倪賓共帶
兵一千二百名義民二千餘名前往東港二十五
日丁朝雄潛遣人將賊所設之大砲灌濕官兵分
三路登岸殺死多賊拏獲守港賊目吳豹仍請添

兵進勦常青以無兵可撥檄令駐劄港口以通糧
米入郡之路莊錫舍自帶手下義民數百往會粵
莊殺賊粵民以其曾經從賊投誠得官共相鄙薄
不與會合莊錫舍獨與賊打仗為賊所敗帶傷而
回莊大田又約許光來等有復擾之勢此府域以
南之情形也諸羅一路聞九月初五至十五日諸
羅鹽水港二處賊匪連日攻擾官兵俱有勝仗十
七日署諸羅縣陳良翼遣數人到鹽水港取去花

銀八百圓詢據來人稱十五日賊攻縣城被官兵
殺退并打死騎馬賊二人聞得林爽文於十四日
手腿中傷已往牛稠山醫治賊目蔡福亦受傷等
語普吉保已於十六日到笨港諸羅城外之賊抽
去十之四五往禦普吉保是以攻圍稍緩三十日
柴大紀又遣人到府取去花銀三千五百圓此諸
羅一帶情形也鹿仔港一路除普吉保李化龍在
笨港番仔溝等處打仗業經該鎮等自行具奏外

查普吉保進兵後賊又垂虛來擾牌頭等莊俱被官兵義民殺退惟二林莊被賊焚殺較甚十五日叅將張朝龍勦大二崙等處三十日格綳額勦大武郡南仔等處俱有勝仗此鹿仔港一帶情形也看來南路賊屢攻府城不利多已退散因官兵從東港進勦是以復行煽聚然該處義民甚多近又赦脇從而開其自新之路益足以堅其效順之心斷不致相隨為逆府城兵力亦足資守禦可無他

虞鹿仔港雖屬有賊擾然該處皆泉州義民甚為
齊心兼有李化龍在彼鼓勵調度亦可無虞諸羅
雖未解圍然不過在十數里之外並非逼近縣城
且兩次遣人往府取銀是米糧尚有可買不致甚
危林爽文被傷之信固屬傳聞未必確實而攻城
之賊多已撤去抵禦普吉保臣昨接普吉保寄來
摺稿據稱知會恒瑞柴大紀訂期三路夾攻想此
時已各路齊進計日可會合柴大紀共籌進剿今

福康安又已開洋粵兵三千一同隨往川省屯練
現在陸續配渡不日繼進兵力益覺壯盛此次進
勦必當所向無前

同日徐嗣曾奏言據臺灣軍需局司道議覆淡水
同知徐夢麟請餉文內以大甲之兵尚未能與鹿
仔港會勦該處義民口糧過多恐滋糜費似宜酌
裁請示等語臣思淡水地處上游此時大甲溪以
北安靜無擾義勇頗為出力即日將軍臣福康安

督師渡港亟籌搗穴焚巢之計該處會合夾攻最
關緊要臣即飭知該司道等現在大兵逕渡鹿仔

港淡水義民口糧未便議裁已于本月初十日自
省添解餉銀六萬兩米六千石運往接濟一面飛
札淡水文武員弁務將該義民妥為安撫于節次
運往糧餉內酌量支給務期民兵併力以待大兵
會合痛殲逆巢至銅山營宮仔汛賊船行劫粵兵
棉衣鞋袴一案據營縣節次拏獲首夥各犯二十

五名訊取供詞雖未據供有勾結林興文夥黨情
事但賊匪行踪詭祕所劫衣物現係解送臺灣征
兵之件必須嚴究有無勾通情節毋任狡脫臣到
泉州送兵後即就近馳赴漳州親自嚴審

同日孫士毅奏言現聞將軍福康安叅贊海蘭察
已帶兵東渡直趨鹿仔港或嗣後有須添兵搜捕
之處惟于閩粵二省就近派往庶幾呼應較靈臣
現在預備之新兵四千已充伍食糧勤加訓練俟

續有應募仍嚴飭將備加意挑選不得令老弱之人充數徒滋糜費至新兵器械一項先儘營中舊存銛利可用者令其按名承領認真演習其偶有必須添給之件即于舊存公費項下製備為數無多毋庸動支別款臣意于業經入伍四千名外再得招募四千名似已足備調遣巡防之用再接准部議撥廣東地丁鹽課項下銀五十萬兩粵海關本年稅銀五十萬兩太平關本年稅銀六萬兩共

一百六萬兩解往閩省備用計撫

臣圖薩布監督

臣佛寧此時當趕緊撥兌

臣

一面飭令藩司許祖

京運司德爾炳阿迅即派定委員眼同彈兌裝鞘
即日起程解往閩省均奏入

上命軍機大臣傳諭福康安常青海蘭察李侍堯柴大
紀普吉保徐嗣曾孫士毅曰廣東莊民同心嚮義視
賊如仇雖以業經投誠之莊錫舍猶因其曾經從賊
不肯與之會合此亦足以見其義憤莊錫舍因粵民

不與協力勦賊益加激勵奮不顧身獨與賊匪打仗以致受傷甚屬出力可嘉著加都司職銜事完送部引見再賞銀一百兩以示獎勵並著曉諭廣東莊義民等以莊錫舍雖經從賊不與一同打仗固屬義舉但現在業已投誠屢次打仗殺賊即與帶兵官升無異嗣後該義民不必心存岐視祇當共効同仇之義協力勦賊以期共申義忿承受恩賞賊目莊大田因其黨羽漸次解散將眷屬搬移潛伏石仔瀨地方其

勢已為窮威丁朝雄經常青派令帶兵往勦灌濕賊
砲殺死多賊並拏獲賊目吳豹因所帶官兵義民不
敷搜勦向常青稟請添兵而常青以府城兵力有限
未能分撥祇令其駐劄港口以通糧路府城原有之
兵不為不多因節次派往諸羅鹽水港援應以致兵
力稍單不能添給丁朝雄尚屬寔在情形不為大過
朕亦不加責備至丁朝雄帶領兵民將東港賊匪奮
勇勦殺寔為出力可嘉昨因副將格綳額打仗奮勇

已有旨諭令福康安將該副將同徐鼎士謝廷選一併察看酌量保奏一人陞補溫州鎮總兵員缺今丁朝雄亦能奮勉並著福康安一併歸入出力之副將內比較何人功績最著即奏請陞用以示獎勵南路村莊民人見大兵雲集賊黨解體指日即就殲擒惟恐官兵一到無從自白致獲罪愆紛紛赴常青處呈請賞給腰牌以為識別可見該處民人已知賊勢窮蹙爭先自為別白率眾具呈而常青給與腰牌將來

安分良民俱可辨識該民人等益可安心守業以助
官軍聲勢寔為極好消息現在南路情形既係如此
則北路一帶村莊民人近見福康安統領勁兵前抵
鹿仔港自更必歡呼踴躍共慶更生福康安于所過
地方其各村莊安分民人亦當照常青所辦賞給腰
牌俾令各有識別安莊服業自為守禦既可以安輯
衆心且于官兵進勦後路更資協助無慮賊人潛出
滋擾尤為妥善至臺灣義民甚多而廣東泉州二處

民人尤為急公隨同官兵打仗殺賊屢經出力自康熙年間廣東莊義民勦賊有功經總督滿保賞給懷忠効忠等匾額是以民人等咸知嚮義踴躍自効但前次匾額祇係總督所給伊等已如此感激奮勵今將廣東莊泉州莊義民朕特皆賜匾額用旌義勇伊等自必倍加鼓舞奮力抒忠但該處莊居甚多難以徧行頒賜著福康安接到匾額後即遵照鈎摹擇其大莊羣居處所普加賞給懸設並傳旨曉諭以伊等

義勇素著出力可嘉是以欽頒匾額賞賜以示優獎
俾該義民等益加感奮竭力圖効以堅其向義之心
看來目下情形常青一路雖因兵力稍單未能奮迅
攻勦但南路賊匪屢被官兵擊退將家屬搬移畏懼
潛伏已無能為且該處民人爭先呈報自別賊勢日
孤無難尅期搜捕至諸羅連次勦賊得有勝仗逆首
林爽文手腿中傷賊目蔡福亦經受傷並因普吉保
進兵笨港其屯聚諸羅城外之賊匪抽去十之四五

前往抵拒柴大紀兩次遣人運取銀兩是道路已無梗阻米糧足資接濟不特守護無慮兵氣亦日見振作又普吉保在元長莊駐劄屢次痛勦賊匪打仗得勝與恒瑞柴大紀定期三路夾攻自可內外應合乘勝奮勦今福康安已于十月十四日開洋自己早抵鹿仔港大兵雲集尤當士氣百倍即日會合長驅定可一舉蕩平將來勦捕事竣海蘭察自應帶同巴圖魯侍衛章京等先行回京至福康安既遠涉重洋正

應乘此大兵得勝之後將一切善後事宜悉心籌辦
妥為區畫不必急于來京瞻覲也至淡水一帶現在
並無賊擾而大甲溪逼近大里杙賊巢地方緊要該
處義民等随同官兵堵禦防守頗為出力即日大兵
進剿該處會合夾攻正當鼓勵義勇協力助剿若此
時因伊等口糧過多輒議裁減恐義民等資糧不給
或至漸行散去轉阻其急公効用之心殊屬失策徐
嗣曾現將銀米添解接濟並令該處員弁妥為安撫

酌量支給使義民等口食充裕招徠日廣將來大兵
進攻正可得其協助甚合機宜所有各處義民口糧
俱應照常支給不可輕議裁減為要北淡水一路逼
近賊巢兵民守禦已久前此徐鼎士與藍元枚訂期
合攻若無藍元枚病故之事自己定計進兵今徐鼎
士徐夢麟以勢難久待已分路進攻並稟請鹿仔港
軍營預備從大肚溪攻擊想徐嗣曾已寄知福康安
令其就近裁酌指示機宜密速辦理該處距賊巢甚

近徐鼎士等自應領兵由大甲攻擊以牽綴賊勢但此時逆首林爽文在諸羅被官兵殺退手腿中傷現往牛稠山逃竄醫治賊目莊大田又因夥黨漸散將家屬移入大武隴自在石仔瀨潛伏是賊首賊目等屢經官兵勦殺正在奔潰竄匿之際福康安到鹿仔港後自必先往大里杙夾攻將林爽文等跟踪追捕以期一鼓擒獲至徐鼎士率領兵民分路進取福康安若因該處需兵濟應不妨于普爾普舒亮二人內

酌派一人帶領巴圖魯侍衛章京十數人帶領二三
千兵前往會合徐鼎士併力攻勦更為得力掣獲賊
目吳豹俟解到內地著該督撫即派委妥員押解來
京審辦

臣等謹按粵莊義民隨同大兵勦捕逆匪激於義
憤視賊如仇雖以業經投誠之莊錫舍猶因其曾
附賊黨屏斥不與會合而莊錫舍遂以獨力勦賊
猝致被創亦可見粵民之相矜以氣節由來久也我

皇上疊加獎勵示以同仇之義化其岐視之心復因康熙年間粵莊舊有懷忠効忠匾額止為督臣滿保所給

特親灑

宸翰寵逮窮檐所以鼓舞而作興之者至矣

上又命軍機大臣傳諭李侍堯徐嗣曾曰周井等犯在洋面肆行劫掠胆敢將運送臺灣軍裝物件搶劫至一百餘簍之多甚屬可惡自當查明嚴辦但該犯等

俱係漳州人而賊首林興文又籍隸漳州該撫查辦
此案若必將該犯等是否係屬林興文賊夥之處詳
加究訊伊等既不肯自行承認勢必展轉追究牽連
波及恐該處民人不無心懷疑懼況此等盜犯審明
後本應按律斬梟即使究出實係林興文夥匪亦不
過正法梟示罪無可加著徐嗣曾止須將該盜犯等
行劫軍裝棉衣之案審訊明確就案完結毋庸展轉
追究致滋疑擾

初二日

丙申

柴大紀奏言九月初三日卯刻賊匪萬

餘乘濃霧未散分別環攻四門營盤鎗砲甚多

臣

同侍衛德成額叅將特克什布等往來督戰各營
盤鎗砲齊發官兵義民等一齊奮勇力戰約共打
死賊匪二百餘名打死騎馬賊二名執大旗賊三
名殺死者亦多至午後賊退逃入十四甲北社尾
角子藁等莊恐有埋伏收軍初六日辰刻賊匪四
五千在北門外田洋斬毀將熟禾稻

臣

隨率把總

蔡開祥石生輝帶隊伍併各義民前往趕殺鎗砲打死賊匪甚多忽山仔頂埤仔頭賊衆數千兩路圍來臣隨飭總兵魏大斌等分頭抵禦施放鎗砲打死多匪至午後賊俱退逃初七日卯刻賊匪率衆萬餘復來侵犯西門營盤臣望見賊匪向前打仗後面將禾稻斬毀隨督飭各將備官兵義民奮勇衝殺鎗砲連環攻擊打死賊匪數百餘名初八日辰刻賊衆復來攻西北二處營盤臣等前往督

戰俱照賊多處用大砲連轟打死賊匪甚多隨率
官兵義民俱出田洋力戰又斃賊各數十名十二
日寅刻賊匪數千分路來攻西南北三處營盤惟
西門番社口賊匪最多鎗砲逼近臣等前往督戰
南北二處賊匪經大砲轟死多人官兵義民併力
殺退惟西門賊匪冒死逼來臣率領弁兵將大砲
移在田洋打死騎馬賊一名執黑旗賊一名併賊
匪數十人兵民向前力戰殺斃多匪未刻賊始退

去因火藥缺少不便遠追獲賊旗鳥鎗長刀腰刀
竹牌等件火藥一桶又九月初七日夜東門雲霄
厝義民賴光前拏獲奸細林培一名髮辮剃去只
留兩角訊據供稱逆首林爽文因連日攻城俱被
官兵殺敗差來與堂兄林觀賜約為內應俟十五
日夜賊衆來攻東南西門發砲五聲為號即從城
內放火亂我軍心以便取勝等情臣即親往將林
觀賜拏獲供認不諱又初八日義民首孫仁拏獲

奸細僧應瑞一名供認在山仔頂大眾廟遇賊夥
楊七交火藥一包囑他在城內十五六等日賊衆
攻城放火內應等情即將該犯等正法一面飭令
城廂內外嚴加防範十五日卯刻果有賊匪萬餘
放砲五聲蜂擁來攻東南西營盤臣同侍衛德成
額叅將特克什布等督率各官兵奮勇向前鎗砲
連環疊進各義民併力鏖戰至午後三處賊匪被
鎗砲打死共三百餘名打傷騎青馬賊一名執大

旗賊三名賊衆俱退申刻復來遠聚于東南兩邊
與我兵相持一夜至十六日黎明賊拚命攻犯東
南二處營盤鎗砲逼近各官兵義民奮勇堵殺鎗
砲共打死賊匪三四百人東邊打死騎花馬賊一
名執大旗賊一名未刻賊俱四散遠逃因火藥不
足收軍獲鳥鎗竹牌賊旗等件子砲一門鉛子一
包惟是諸羅被困三月有餘糧餉全無雖經會同
署諸羅縣陳良翼多方勸捐殷寔人民共樂急公

但經賊擾以後家少蓋藏捐助終屬不敷所有地
瓜花生皆已食盡其附近田稻被疊次打仗踐踏
至今僅有四五分成熟乃民間饑餓所迫紛紛割
取難以禁止二三日即已罄盡兼之火藥缺乏就
地煎硝而每日所出不過四五十斤寔不敷用勢
殊危急探叅贊恒瑞領兵已于上月二十八九等
日陸續到鹽水港總兵普吉保領兵于本月十三
日抵笨港已再密差往二處訂定來諸日期以便

帶兵向前接應所有官兵義民滿城百姓聞此信
息莫不歡欣踴躍苦守數日兩路大兵自必齊集
儘可併力勦洗

同日常青奏言九月初七日賊目張基光洪賽等
率賊二千攻擾東港之竿林等莊有義民首林成
率衆堵禦殺賊八十餘人初九日張基光等復糾
水底寮賊三千餘來攻又被林成會齊竿林內六
莊義民奮力殺賊並溺斃之賊約有數百人奪回

大小砲礮械無數並前被賊夥林進李靜等佔踞
之新園等莊亦經林成等義民同粵莊義民恢復
各賊匪逃往水底寮聲言再約賊匪來攻現在義
民首林成同粵籍義民等懇發官兵前抵東港情
願齊心接應臣察看此時遠近莊民因賊匪勒取
糧米抽分田穀俱願同心殺賊保護村莊既經竿
林等莊義民倡率防禦自係極好機會況有督臣
李侍堯派來進攻東港陸路兵一千名對換水師

內除已派二百名交千總王國志等帶同府城義民二千前往鹽水港外現有兵八百名即于十三日派令副將丁朝雄並原派來之遊擊倪賓守備查城帶領又派守備林登雲管帶新募入伍之兵二百四十名一同起程由水路直取東港一復東港不但府城糧運大通而南路賊勢自必窮蹙至總兵梁朝桂于初九日到鹽水港劄營與恒瑞大營相近即日與賊打仗勦殺賊匪甚多並燒燬賊

察又恒瑞派副將謝廷選同遊擊劉越共帶兵九百名在新莊劄營于初八日與賊打仗得勝查新店係水道登岸港口為鹽水港後路既有該副將等駐守恒瑞處所需軍火糧餉自可源源運送惟接據柴大紀咨稱八月二十日副將蔡攀龍叅將孫全謀遊擊邱能成等率領官兵來縣查副將貴林遊擊楊起麟都司杭富守備馬大雄四員及千總外委陳邦材陳洪猷等二十一名均聞在途遇

害蔡攀龍等帶來官兵一千二百六十六名損失
六百二十二名邱能成等帶來兵五百十二名損
失一百五十六名又藤牌等兵丁九十名損失十
四名其現到各兵隨帶藥鉛六百餘斤運來餉番
銀一千六百三十五員守備楊彰在西門外打仗
受傷身故恒瑞親統大兵已抵鹽水港柰諸羅附
近各莊處處均有賊匪潛伏圖截官兵來路苟非
設法分其賊勢大兵未易前來惟懇飛催鹿仔港

普吉保李化龍速派勇戰兵丁義民揀選大員統領前來俾賊知鹿仔港兵動必分其黨以禦我兩路官兵則諸羅一帶賊勢自弱再差汀州義民游永盛等齎摺赴郡祈再給發番銀一千三百元迅速帶回以濟急需等情臣因普吉保前咨有商留總兵李化龍在鹿仔港固守即親帶官兵前往西螺斗六門一帶打通道路之語復又飛札屢催諒該鎮此時業已起兵現又有府城義民二千情願

前往而義民游永盛等既可陸續運送餉番則藥鉛並可設法零運必不致于乏絕不日南北官兵義民齊到叅贊恒瑞柴大紀總兵普吉保酌籌並舉內外合攻道路自必通暢賊首尅日可擒惟遊擊邱能成在諸羅縣城西門外番仔溝與賊打仗被傷身故恒瑞帶往之護軍叅領岱森保患病未愈臣因派撥健銳營翼長烏什哈達前往適值內地調赴鹽水港弁兵三千名陸續進發即令該翼

長一同星速馳赴一到恒瑞軍營即與總兵梁朝桂等酌籌進攻至南路東港臣派令副將丁朝雄管帶弁兵由海道乘機進攻在鳳山縣屬之竹仔港見有賊船數隻即施放鎗砲打破賊船一隻賊匪百餘人俱各棄船奔岸逃走該副將同革職叅將那穆素里等帶兵登岸追趕鎗砲斃賊十餘人生擒賊犯丁把洪賀二名當將各賊船燒燬仍即收兵回船候風又于十七日船抵東港暗令目兵

李奇林光海浮水登岸先將賊人設防大砲灌濕
將備弁兵齊到港口直攻進港賊各驚竄官兵追
趕殺賊七名奪獲鎗砲弓刀等賊械又搜捕賊匪
方得勝等十二名現在東港安撫百姓並哨探近
港均有賊匪糾集該副將同遊擊倪賓等于路口
安營堵禦並會商粵莊義民總理曾中立等仍曉
諭各莊將米穀由港運赴郡城糶賣現有載兵之
船回郡俱已裝載米穀開行

臣

查東港原係南路

糧食赴郡之港口今官兵已經到港勦捕商販米
谷即由回空兵船裝載來郡郡城米價現已平減
但據稱近港均有賊聚則此時尚不能為收復東
港之功現有粵莊義民首舉人曾中立並俸滿教
官羅蔭前協同辦理一俟全行通暢併粵民等莊
糧食俱可由港出口到郡無阻臣即查明官兵義
民有功者分別請獎另行奏報又叅贊柴大紀報
稱福寧鎮標中營遊擊田藍玉捏稱原配鎗砲器

械並無遺失迨親往查驗始據兵丁蘇得亮等供
出鎗砲牌刀各有遺失蔡攀龍等帶兵來援隨帶
將弁接應而該遊擊不即前往屢催始帶兵在後
緩行請將遊擊田藍玉革職以肅軍紀又十五日
有鳳山縣屬之竿林大林浦等莊及廣東莊各民
人約有七八千來營懇給告示當即給發告示腰
牌又十四日有賊數千從南潭萬松等處前來當
派江寧將軍永慶廣東副都統博清額翼長烏什

哈達協領豐伸佈伊清阿領隊侍衛郭爾敏色等
帶領弁兵並各義民由山梁卡直向二王宮廟進
勦遇賊接仗官兵奮勇撲擊鎗砲並施賊人四散
逃竄官兵分開左右二翼兩路截殺自己至申賊
人奔逃鎗砲斃賊百餘人

同日恒瑞奏言賊匪連日在鹽水港攻擾營盤俱
被官兵殺退該處附近村莊民人經恒瑞開導曉
諭俱各安貼其造冊投誠者共有八十餘莊當給

以腰牌又與賊匪打仗時投出廖進高一名訊係
前隨貴林前赴諸羅被賊搶去今因賊匪被官兵
追急乘間脫出若即行究辦恐前次同時衝失之
兵不敢投到是以交與梁朝桂令其隨營効力都
司蕭應得守備李自昌打仗出力該二員前在金
川曾經出力今俱賞戴花翎其都司黃象新賞戴
藍翎

同日李侍堯奏言府城南至鳳山一帶賊夥漸散

各莊民俱起義効順九月十一二等日山猪毛粵
民會同泉民在新園逐賊殺溺死者甚多沿途各
莊俱相隨殺賊粵民劄住新園泉民劄住下牌頭
合萬餘人至郡具呈并稱若大兵進勦伊等情願
隨軍効力是以將軍常青派丁朝雄倪賓等直取
東港莊大田因夥黨漸散已逃往石仔瀨鳳山境
內略已無賊東港之米有來至府城者市價每石
頗減七八百文是南路大勢已定惟昨據吳元琪

來稟有莊錫舍殺敗逃去賊匪又欲糾煽抗拒等語然賊夥已經渙散即糾約亦未必能多而該處義民甚衆兼有丁朝雄等就近彈壓必可無虞至鹽水港自九月十五以後賊見梁朝桂等官兵及府城添雇義民二千前往兼有蕭隴等莊義民相助賊遂漸退惟阻截道路以困諸邑而不敢復攻鹽水港又有諸羅賊目李七者最為驍悍巡檢邵宗堯聞其有歸順之意因義民柯光明柯得騰懇

請自効遂將二人帶赴恒瑞處即令齎諭密招李
七李七已領收并有願先送妻子為質再相機行
事等語又徐鼎士亦稱十月初六日派遊擊吳秀
等在岸裡社一帶進攻大里杙該副將與都司敏
祿等由牛罵頭等處進攻大肚溪是各路俱已進
兵賊須處處分力抵禦勢必不支又岸裡社熟番
素不從賊八月十六十九等日有賊來擾俱被該
番等殺退吳元琪已遣人傳諭該社貢生潘士興

張鳳華等聯絡生番斷賊走入內山之路則將來賊匪竄逸亦有生熟番把截不致兔脫看來俱是極好機會今福康安等大兵接續前進必可得手至鄭國卿所帶之兵臣前與福康安面商以府城稍覺單薄是以奏明仍令赴常青處昨因風勢稍平該鎮業已放洋計此時已抵臺郡未便追回轉赴鹿仔港且府城南路各莊原聞有十萬大兵剿賊之說是以賊散而義民紛起今若無一兵添往

未免觀聽所關義民又懷疑慮賊復生心窺伺是
鄭國卿之兵仍應赴常青處聽候調度較為有益
至四川將軍鄂輝于本月十六日到泉州其頭二
起屯練兵亦已于十六七等日到蚶江餘于二十
一日可以到齊已到之兵現在支領鹽菜口糧及
鑼鍋帳房馬匹等項陸續登舟配渡均奏入

上命軍機大臣傳諭福康安常青海蘭察柴大紀李侍
堯曰賊匪狡詐百出胆敢遣其黨夥潛約內應而林

培一犯已將髮辮剃去則前此所傳林興文有蓄髮親丁之說並不為虛經柴大紀察出即行查拿正法使賊匪無由逞其鬼域之技所辦甚好其拿獲奸細之義民賴光前孫仁並著酌量加賞又普吉保自到笨港後已節據奏報屢次打仗得勝勦散賊匪現在咨會柴大紀恒瑞訂期會攻此時福康安已抵鹿仔港軍威更盛柴大紀等更當加倍奮勉至署諸羅縣陳良翼數月以來多方勸諭殷寔之戶捐助糧食民

人共樂急公得資接濟陳良翼寔為出力伊已推陞
知州呈明告養因病尚未回籍經常青等委令代理
縣事今該員仍能奮勉自効甚屬可嘉著以知州銜
即補諸羅縣知縣料理一半年令其回養德成額特
克什布于賊匪攻犯營盤時往來督戰殺賊甚多德
成額現已因其出力陞補健銳營前鋒叅領其特克
什布著交福康安于軍營遇有應陞之副將缺出即
奏明陞用魏大斌前以無能降旨革職今據柴大紀

奏伊在山仔頂處帶兵堵禦剿殺賊匪如果寔在出力尚可降補都司以觀後效又鳳山及廣東莊民人既悔罪投誠即為良善常青給發告示腰牌令其各回本莊互相保守其從前被賊逼脅無奈聽從之處不加深究甚屬得當民人等紛紛投營呈明並非賊黨足見賊勢已孤寔為極好消息常青正當乘此機會廓清南路至該處義民如舉人曾中立辦運米谷游永盛齋送番銀林成在東港等處率眾堵禦殺賊

均屬奮勉急公曾中立前已有旨令福康安等查明
係文舉人酌賞文職武舉人酌賞武職如人才可用
即予以寔缺其游永盛林成二人亦著查明量加賞
給職銜或酌用寔缺諸羅武舉黃奠邦督率義民在
城守禦素為出力已有旨令常青等酌量錄用伊等
如有情愿服官者將來事竣時不妨分別予以寔缺
用示獎勵黃象新屢經打仗殺賊甚屬奮勉亦著賞
戴花翎至李七係賊人頭目今既有歸順之意經恒

瑞令義民齋諭往招李七愿先送妻子為質自應設法即為招致以解賊黨此事何以未據恒瑞奏及再賊首林興文昨據李侍堯奏手腿中傷已往牛稠山醫治恒瑞所奏亦復相同其語自當確寔但林興文中傷一事係在柴大紀處抑在普吉保處著福康安即行查明具奏至福康安遠涉重洋督辦軍務海蘭察率同巴圖魯侍衛章京等奮勇宣勤現在正值隆冬之際朕心深為軫念福康安海蘭察俱著賞給元

狐暖冠各一頂柴大紀力捍圍城勞績茂著亦著賞給元狐暖冠一頂以示體恤

上又諭內閣曰邱能成自勦捕逆匪以來節次奮勇殺賊甚為出力屢經擢陞遊擊今因傷身故寔堪憫惜著交部加一等以叅贊銜照陣亡例議恤至援應諸羅中途被害各員除貴林楊起麟抗富業經降旨賜卹外其守備馬大雄及在西門外打仗傷亡之守備楊彪均著交部議給卹典其餘千總外委陳邦材陳

洪猷等各員並著該將軍等查明咨部照例議卹以示軫惻

上又諭內閣曰田藍玉帶兵前赴諸羅于兵丁遺失軍械有心捏飾追跟隨柴大紀接應蔡攀龍時又復行走遲緩寔屬狡詐怠玩僅予革職効力不足示懲田藍玉著革職即在臺灣府城永遠枷號示衆以昭儆戒

上又諭內閣曰本年閩省勦捕臺灣逆匪所有添調各

省官兵經過地方一切軍需供應俱經發帑支給絲毫
不以累及閭閻惟是運送糧餉軍械等務間亦酌用
民力雖並給與口糧腳價而該處民夫急公向義無
不踴躍從事實堪嘉尚自宜特沛恩膏除漳泉二府
因本年被旱歉收曾經降旨加恩令該督等查明緩
征並臺灣府屬本年及五十三年應征錢糧概行豁免
外仍著李侍堯等將福建通省承辦軍務各州縣所有
官兵經過地方就其差務繁簡出力輕重查

明應如何酌量加恩分別蠲緩之處詳細核定迅速奏聞候朕另降恩旨

臣等謹按臺灣勦捕逆匪以來軍需供頓皆特發官帑絲毫不累閭閻且漳泉二郡被旱歉收地畝已奉

旨緩徵而臺郡一歲正供又全予蠲免

聖慈軫恤亦既無微不至乃復因民夫運送糧餉軍械急公無悞

特勅將官軍所過州縣核其差役繁簡輕重分別蠲緩
所由民不知兵相與感頌

皇仁共安耕鑿之休也

上又諭內閣曰總兵梁朝桂叅領岱森保帶兵前往鹽
水港一帶勦捕賊匪寔為奮勇梁朝桂著即賞給奮
勇巴圖魯名號並照例賞銀一百兩岱森保著賞給
副都統職銜以示獎勵

欽定平定臺灣紀略卷四十二

欽定四庫全書

欽定平定臺灣紀畧卷四十三

十二月初三日

丙寅

上諭內閣曰朕于軍旅之事有功必賞有罪必誅從不肯稍存姑息即如此次臺灣帶兵之郝壯猷因賊匪復擾鳳山棄城不守不待大學士九卿核擬即將伊于軍營正法其貴林楊起麟邱能成諸人皆因奮勇勦賊臨陣捐軀即勅部從優議卹一律得給世襲刑

賞昭然惟人自取今臺灣領兵各員俱能爭先効用
未必不因郝壯猷覆轍在前共知儆勵蓋兵可百年
不用不可一日不備而信賞必罰絲毫難以假借此後身
膺閫寄者當咸知凜惕遇行軍之際務須身先士卒
克敵致果共曉然于功罪所分視乎勇怯如能共矢
蓋誠著有勞績必躬膺茂賞承受渥恩若畏怯倖生
必致自蹈重愆身罹憲典庶幾人知敵愾士皆用命
毋負朕整飭戎行諄諄告誡之至意

上又諭內閣曰臺灣逆匪林爽文糾衆倡亂以來提督
柴大紀統兵剿捕收復諸羅後賊匪屢經攻擾城內
義民幫同官兵奮力守禦保護無虞該處民人急公
嚮義衆志成城應錫嘉名以旌斯邑着將諸羅縣改
為嘉義縣俾閭閻良民倍加奮勵以昭獎勵

臣等謹按逆匪林爽文糾衆倡亂以嘉義為南北兩
路要衝百計滋擾當福康安援兵未集之時嘉義
被圍已及五月賴城內義民多方保護危而獲安

雖以柴大紀怯懦無能為義民等遮留因得堅守
待援保全閭邑數萬生靈之命迨夫大兵雲集重
圍立解賊人喪膽遂成破竹之勢是義民守禦之
功實臺郡全局所繫

國家教澤涵濡

恩意周渥小民急公奉上出於至誠用能同心協力繕
完守備屹若金湯我

皇上旌其嚮義錫以嘉名有勇知方洵史冊所罕覩也

同日書麟奏言川省運米二十萬石沿江押護員弁稽查催僭各船俱揚帆順流而下遇晚停泊即督率兵役徹夜巡邏防範並無盜賣及攬和情弊亦不敢片刻稽延一面咨明督臣李世傑江蘇撫臣閔鶚元飭屬預備海船接收轉運奏入報

聞

初四日

丁卯

常青奏言提兵梁朝桂帶兵一千名于

二十九日由海道前往鹽水港協助想此時早已

到彼計鹽水港本有之兵併派去各兵共有五千
餘名尚有義民等協同禦剿軍聲尚為壯盛嗣聞
鹿仔草庄於八月二十八日被賊焚劫兵民退回
鹽水港緣鹿仔草鹽水港二處本有遊擊楊起麟
邱能成分駐防守與縣城相為犄角且柴大紀自
夏秋以來賊匪不時侵擾縣城又調遊擊楊起麟邱
能成往諸羅護守固以縣城為重而鹿仔草之失
實因兵力單弱之所致也今鹿仔草雖失尚有小

路數處可通諸羅縣城臣恐鹽水港人情惶惑飛

催梁朝桂星速趕赴加意防範並飭令縣丞徐英

前往安撫民人多招義勇與官兵協力堵禦再臣

自南路齊派官兵赴援必須鹿仔港亦派官兵自

北路齊赴則賊勢必將分散前已三次飛札普吉

保于新到兵內酌量抽撥由笨港一帶應援諸羅

又飭總兵李化龍如到鹿仔港即帶兵三千星速

赴援茲據普吉保咨稱留李化龍在鹿仔港固守

即親帶兵前往西螺斗六一帶打通道路臣
仍飛札該鎮務與恒瑞柴大紀等預先關合
訂期並舉則賊人首尾不能相顧不但可解
諸羅之圍即可乘勢進剿立破賊巢至南路
賊匪各處臣督率官兵迎擊約計鎗砲斃賊
五六十人兵民受傷者十餘人現據督臣李
侍堯已調水陸提標兵三千名到廈門配渡
並聞督臣孫士毅已調廣西兵三千名列

潮州

臣

已札知二督

臣

速發此項兵到臺灣軍營

遣用此項兵到

臣

一面留兵守城一面帶兵攻擊

北路會集諸羅與叅贊鎮將等合兵攻擊大里杙
殲擒首逆至臣軍營官兵節次撥往諸羅一萬有
餘所存營盤之兵雖止四千餘尚足防禦惟諸羅
柴大紀等自副將蔡攀龍等到縣以後旬日有餘
尚無文報恒瑞現駐鹽水港應俟有普吉保帶兵
攻打西螺斗六門一帶之信即與柴大紀開會夾

擊但恒瑞帶兵三千去後又派總兵梁朝桂帶兵
一千趕赴此時諒必一同駐劄該處尚有義民協
助今府城各義民又情願往鹽水港幫同打通諸
羅立功自効臣復派千總王國志董國瑞帶水師
兵二百名並管帶府城義民二千前往柴大紀聞
知前後兵民齊到鹽水港自必與恒瑞普吉保會
合進剿以通往來諸羅道路

同日柴大紀奏言十五日辰刻賊匪率衆來攻東

西北三門營盤鎗砲較前更多臣同特克什布及
德成額官保等往來督戰調叅將潘韜遊擊李隆
飛往西門三苞竹一帶夾攻敗匪退逃北門外賊
匪從台斗坑北社尾二路繞至與官兵對放鎗砲
被大砲轟斃多匪內打死執大旗賊二名又連環
鳥鎗打死數十人官兵義民奮勇而前殺賊甚多
賊衆四散惟東門賊匪尚不肯退臣親帶隊伍義
民由臺斗坑田洋橫冲魏大斌等官兵由雲霄厝

殺出遊擊林光玉由王田崗小徑斜擊殺賊數十人獲鳥鎗賊旂襍械等項二十日辰刻賊匪率夥千人在東門外之姜母蔡王田崗兩處搶割稻穀臣飛飭遊擊李隆林光玉等帶領兵丁義民馳赴該處分頭剿捕臣帶兵在八掌溪壩接應遊擊李隆至姜母蔡鎗砲打死十數人賊匪棄穀奔逃獲鳥鎗令旂等件穀三十餘石林光玉至王田崗賊匪數百在田割稻一半與官兵抵敵被鎗砲擊死

賊匪十餘名賊盡捨所割之稻由山逕逃竄獲濕穀四十餘石均交縣收存以作軍糧兵丁義民俱無損傷二十一日已刻賊匪數千來攻東北營盤臣同侍衛德成額等督率官兵齊放大砲打死賊匪數十名賊恃有鎗砲竟不畏懼旋退旋來魏大斌詹殿擢林光玉等督率弁兵義民在雲霄厝抵敵又報西門外店仔尾賊衆來攻營盤臣隨飛往督戰連放大砲打死賊匪數十名復調遊擊李隆

叅將潘韜帶隊伍義民前來夾攻打死賊匪數十名賊盡逃往各庄竹圍茂密難以前進其東北二門之賊亦經殺退追過臺斗坑因禾稻茂盛田塍狹小不便遠追俱令收軍二十三日午刻賊匪萬餘來攻東西北三處營盤臣同侍衛等往來督令鎗砲連環齊轟北門外賊匪被大砲打死十數名賊隨擁向東邊遊擊林光玉施放大砲又打死十數名臣督率官兵義民由臺斗坑前田洋攻其右

遊擊林光玉帶兵從山仔頂攻其左魏大斌帶官
兵自雲霄厝一直冲殺鎗砲打死數十人賊隨退
逃時西門外店仔尾賊匪鎗砲甚多勢更鴟張臣
飛調遊擊李隆叅將潘韜官兵義民從右殺來施放
大砲打死賊匪七八十名官兵義民一同追殺賊
逃過八獎溪獲賊旂賊械等項因大雨收軍二十
六日已刻賊匪萬餘復來侵犯東西北三門營盤
臣同叅將特克什布等督戰遊擊林光玉施放大

砲打死數十名賊隨轉向雲霄厝蜂擁前來又同
魏大斌詹殿擢等督令官兵施放大砲連環疊進
併飭遊擊林光玉帶兵民由山仔頂圍殺斃賊多
名賊隨沿山奔逃其北門外賊匪由埤仔頭竹圍
內擁出鎗砲與官兵對打把總楊起鵬連放大砲
兵丁義民一齊奮勇向前協力鏖戰鎗砲打死及
殺死賊匪計百餘名追過臺斗坑惟西門外賊匪
鎗砲較多冒死逼近營盤臣帶把總蔡開祥併鎗

砲手飛往攻擊轟死賊匪百餘名臣見賊勢稍退
率叅將潘韜守脩邵振綱各官兵一齊趕出署諸
羅縣陳良翼教諭江浩飭令義民奮勇向前協殺
至申刻又打死賊匪百餘名二十七日辰刻賊衆
復來侵犯四門營盤臣同叅將特克什布侍衛德
成額官保等督率官兵義民協力堵殺先令大砲
連轟各打死賊匪甚多即率鎗手併打進步連環
義民緊隨協助賊被鎗打死者百餘名時東南北

賊匪俱經殺敗追趕過溪四散逃匿惟西門外新店尾番社口二處賊匪鎗砲對打雖被官兵打死多人而旋退旋來抵死不懼臣等奮勇向前力戰至未刻打死賊匪數十名內打死執大旗賊二名賊退追過田洋因田中禾盛水滿未便遽追俸滿巡檢吳元都司羅光焰等被傷獲大旗二面鉛子一包火藥一桶鳥鎗及長柄刀襍械等項八月初二日辰刻逆賊糾衆復犯諸羅東北角雲霄厝營

盤

臣

同侍衛德成額官保叅將特克什布等督率

官兵義民向前抵敵遊擊林光玉施放大砲賊衆

被砲打死數十隨飭帶兵從山仔頂轉來夾攻鎗砲

打死賊匪百餘人忽臺斗坑擁出賊匪數千直犯

北門營盤

臣

隨趕回督率守備陳明德把總楊起

鵬施放大砲轟擊鎗手連環進步自辰至未大砲

打死賊匪甚多官兵義民奮勇爭先殺死賊匪三

四十人賊衆四散逃走追過臺斗坑收軍獲賊旂

賊械等項初五日已刻賊匪七八千來攻西北營
盤臣等在西門新店尾施放大砲打死賊匪多人
內執大旗賊匪一名官兵義民追殺過田洋賊退
入三苞竹庄內其北門外賊匪經把總楊起鵬施
放大砲連環轟擊打死賊匪數十人賊逃過溪忽
東邊山仔頂復擁出賊匪千餘來攻雲霄厝隨督
率官兵義民前往堵禦臣復調遊擊林光玉帶隊
伍從東夾攻鎗砲打死賊匪甚多賊遂奔逃恐有

埋伏收軍又聞賊匪在諸羅東邊雲厝地方搬搶
民間糧食隨於初九日黎明先令遊擊林光玉帶
領隊伍併義民同往搜捕又調詹殿擢田藍玉等
率領官兵義民往北巡哨以防賊匪前往攔截行
至埤仔頭北社尾即有賊匪二三千從庄內擁出
被官兵連環疊進打死賊匪百餘名賊始退去復
報西門外番保溝亦有賊匪三四千來攻新店尾
及番社口各營盤臣隨馳往該處督率官兵奮勇

力戰大砲連環斃賊甚多至未刻西北二處賊衆
分逃過牛欄溪三苞竹等處隨收軍回營其遊擊
林光玉所帶隊伍至盧厝庄殺退賊匪擄去糧食
亦經收回查義民等奪獲賊穀地瓜乾約有四百
餘石賞給各義民作口糧獲賊旂賊械等項十二
日已刻賊匪萬餘復來攻西南北三門營盤臣等
往來督戰各營盤大砲疊轟共斃賊匪數十名烏
鎗連環打死賊匪甚多至未刻南門外賊匪隨退

惟西北二門賊匪愈殺愈多臣飛調魏大斌帶領官兵自東殺至北李隆率帶隊伍自南殺至西兩路夾攻共打死賊匪百餘名獲大旂三面併賊械等項守備楊鵬因傷重身故其所帶兵弁委員接管再諸羅被困兩月有餘八月二十九日收得義民運來番銀一千六百三十五圓並無糧餉運到差探賊情因兩次援兵損失甚多遂思乘勢連攻以重困諸羅于本月二十一二十三二十六等日率衆

萬餘疊次環攻俱經臣同特克什布德成額等奮
勇堵殺鎗砲打死賊匪六七百人獲賊旂五面書
偽鎮南大將軍偽西路左先鋒等字樣獲行砲一
門鳥鎗腰刀竹牌雜械等項賊逃入十四甲牛稠
山埤堵等處竹園茂密內藏大砲外有溝渠我兵
不能逼近收軍回營侍衛官保遊擊卽能成被傷
生獲賊匪二名審明正法惟被賊圍困糧餉兩缺
藥鉛不足兵民均以花生牛隻充腸危急情形較

前愈甚而官兵義民百姓番衆俱能忍餓禦賊並無懈志惟有益加鼓勵設法固守以待大兵齊集同日普吉保奏言克復笨港後親督官兵分派叅將張朝龍海亮搜剿焚燒各賊巢計尖山宜梧等處二十六村庄其有挈眷逃出者嚴禁官兵鄉勇不得阻撓十九日探聞笨港潰散賊匪復糾約斗六西螺各路夥黨率衆萬餘分路前後繞截隨分布官兵各路抵禦自辰至酉鎗砲攻擊竟日不退

賊匪蔓延田坎佔住沙崗臣于東庄口率領遊擊
海亮千總李漢升帶同官兵直撲上山賊匪始行
潰散當被鎗砲打死百十餘人惟時各路官兵人
人奮進即漳州隊內各兵亦皆踴躍直前賊匪抵
敵不住適護副將琢靈阿帶同守備宋國興由到
雲厝堵截前來叅將張朝龍帶同守備王德俊由
山仔腳衝殺夾攻共計打死賊匪叁百餘名奪獲
長鎗器械五十餘件二十日賊匪復出滋擾臣仍

督率將備員弁帶領官兵分路堵殺自辰至未鎗
炮打死賊匪一百餘名奪獲器械二十餘件元長
各村居民見官兵連日剿殺賊匪歡聲動地現在
紛紛來歸者不計其數均經妥為安撫惟是賊匪東
散西聚出沒靡常雖屢經挫敗然蓄謀詭譎糧道
後路最關緊要業經十八二十一等日密遣妥人
飛稟恒瑞柴大紀訂期會攻尚未接准移覆一俟
訂期既定後路廓清臣即親帶官兵前進再九月

二十九日探得賊匪屯距附近土庫地方臣親率官兵剿捕賊匪散布田坎竟日抗拒連用鎗砲打死約有三四十人賊始退散三十日逆首林爽文復糾約賊夥三面攻擊營盤臣督率將領分派官兵鄉勇奮力堵殺自辰至申鎗砲打死賊匪甚多割獲首級耳記併奪獲火藥鉛子皮牌長鎗刀械各項兵丁鄉勇亦有傷亡者十月初四日聞賊匪屯聚崙尾庄等處臣傳集熟悉道路鄉勇派撥

官兵定于初五日黎明進剿聞諸羅砲聲甚急
隨潛行前赴崙尾埤田心仔庄一帶勦捕見該處
地多竹林蔗園路徑狹窄恐有埋伏督令官兵鄉
勇小心防範賊匪星散田坎赤身洗足前來迎敵
橫施鎗砲官兵奮力向前正在鎗砲攻擊之際竹
園內復突出賊旂數十蜂擁應援官兵鄉勇奮力
抵殺用連環鳥鎗傷斃賊匪甚多餘賊漸退賊庄
多係搭盖草寮當令放火焚燒詎意賊匪散而復

聚仍然抗拒又被鎗砲打死數十人併生擒賊犯
六名餘賊始潰計焚燒賊寨共三百餘處割獲首
級耳記奪獲器械多件併將出力各官兵鄉勇獎
賞鼓勵其獲犯洪達等六名訊明正法伏思元長
庄相距鹿仔港八十里後路賊匪時出滋擾糧餉
藥鉛若由旱路運送恐中途被截所關匪細現有
五條港水路可以舟運曾將糧餉運到一次自港
登岸離營盤僅只二十里臣派撥官兵沿途護衛

可保無虞惟土庫之賊勾通斗六門夥黨屢要抄襲後路臣惟有身先士卒痛加剿洗以除後患均奏入

上命軍機大臣傳諭福康安常青海蘭察柴大紀李侍堯普吉保曰常青自駐守府城數月以來雖未能奮力進取不免稍事因循今據節次奏到派兵援應諸羅鹽水港及在府城堵禦剿賊各情形予調度機宜尚為妥協看來常青雖係年老究係經事較多尚可

以資任使恒瑞到鹽水港後雖未能將附近賊匪悉
力剿散打通道路而閱昨日奏到各摺伊在彼安撫
庄民堵禦賊匪諸事亦尚有料理前曾諭令福康安
將常青留于府城委以南路剿賊之事恒瑞著令解
任回京候旨今常青恒瑞所辦諸務俱尚能奮勉著
福康安酌量情形如伊二人在彼均尚能得力不妨
俱着留于該處以資協助帶兵柴大紀前次檄調楊
起麟卽能成之兵赴縣亦因該處被圍緊急存城兵

力無多而各路援兵不能即至亦迫于事勢之不得不然今普吉保已收復笨港與柴大紀恒瑞訂期夾攻自己早經會合其鹿仔草一帶屯聚賊匪無難乘勢掃除是柴大紀調用楊起鵬邱能成之兵未為大錯福康安亦不必因鹿仔草一事將柴大紀加之責備也至粵西兵三千早經全抵廈門福康安帶領同赴鹿仔港不可又派往府城其李侍堯所派閩兵三千昨據李侍堯奏其先到之一千五百名已經撥

赴恒瑞處現今鄭國卿帶兵一千五百名前赴常青處應用常青處既有此項兵力接濟自己足敷勦捕諸羅城外屯集賊匪于七八兩月屢次糾合夥黨肆行侵擾俱經柴大紀督率將弁等竭力堵禦殺賊甚多城內官兵義民及番衆等同心固結並無懈怠實為勤苦出力其打仗出力之將弁等俱應優加陞賞內如特克什布德成額官保等于賊匪滋擾營盤時往來督戰殺死多賊最為奮勇特克什布昨已有旨

令福康安于軍中遇有應陞之副將缺出即行陞用
德成額現已因其出力陞補健銳營前鋒叅領仍着
福康安留心察看此後如該員再能奮勇立功即據
實奏聞即以副都統補用官保在西門勦賊被傷較
重亦着福康安查明如果打仗奮勉即奏明以應陞
之缺陞用此外在事出力員弁俱着福康安一體查
核于軍營現出各缺內酌量奏請陞補至魏大斌已
有旨降為都司以觀後效在雲霄厝等處連次打仗

殺退賊匪尚知勉力奮勇着福康安遇有軍營副將
缺出即將魏大斌奏請補用俾益加感奮立功自効
賊人狡詐伎倆往往于官兵後路攔截餉道今普吉
保設法將糧餉火藥由水路運送極合機宜而土庫
一帶賊匪勾通斗六門夥黨思欲抄截官兵後路普
吉保現在帶兵將該處賊匪痛加勦洗所辦亦好現
在福康安同海蘭察等帶領巴圖魯侍衛章京等
前抵鹿仔港粵西川黔之兵俱陸續齊集軍威壯盛

而柴大紀恒瑞普吉保各路亦俱連次得勝士氣振奮聲勢聯絡即日福康安統領重兵會合攻勦諒此么膺小醜豈能苟延殘喘朕日夕盼望捷音之至

上又諭內閣曰普吉保前由大突候往笨港勦賊克復笨港已降旨交部議叙茲復督率將弁兵丁奮力勦殺前後打死賊匪五六百人奪獲器械甚多奮勇可嘉除普吉保業經議叙優賞外其隨同出力之官弁並着將軍福康安一併查明咨部分別議叙以示獎

屬

初五日

戊辰

恒瑞奏言現在賊勢甚大賊目甚夥處

處俱被賊人佔據民人領受腰牌者不過為後日

立足地步並非其心不敢從賊臣所領之兵僅有

五千只能防守鹽水港新店海口實不能向前進

取普吉保亦帶兵五千駐劄笨港不能前進坐視

諸羅被賊圍困不能救援倘諸羅一失鹽水港亦

難防守目今全臺地方僅餘沿海一帶及府城鹽

水港笨港鹿仔港等處餘俱被賊佔據其勢漸大
數日以來風勢又猛海中舟不能行福康安又無
到來信息臣實在不勝憂懼看來此事不動大兵
難以完結倘賊衆入山更費周章臺灣地方遼闊
風土與內地不同臣愚以為暫守已經恢復地方
與接續後路即需兵二三萬直搗大里杙水沙連
大武隴等處賊巢剿捕賊目亦需兵二三萬人又接
到普吉保來札稱伊若帶兵前進恐後路無兵接

續並聞諸羅城內糧餉火藥不能接濟臣即使帶
兵能抵諸羅亦仍不能殺出于事無益且新店海
門距鹿耳門甚近倘鹽水港再有疎失其事更大
臣現與梁朝桂等酌派兵一千五百名駐守新店
海口再派兵五百名駐守鹽水港其李侍堯派撥
之兵已到九百名皆係召募新兵現同梁朝桂上
緊訓練奏入

上命軍機大臣傳諭福康安常青海蘭察李侍堯孫

士毅柴大紀普吉保曰連日據柴大紀普吉保等奏
報該二處屢得勝仗現在訂期會合夾攻而常青處
亦節次奏到屢經打仗殺賊雖未進取而自守實屬
有餘是剿捕事務各路俱大有轉機何以恒瑞獨為
此驚惶無措之語自係恒瑞少不更事怯懦無能是
以遇事張皇茫無主見即如所稱諸羅城內糧餉火
藥不能接濟若有疎失則鹽水港亦難保守等語試
思柴大紀被賊圍擾已經數月城中糧餉火藥早屬

不敷柴大紀激勵兵民悉力守禦並能剿殺賊匪况
節據李侍堯柴大紀奏蔡攀龍等接應諸羅多僱夫
役將糧餉火藥隨同運進柴大紀兩次赴府城鹽水
港調運番銀復經奪獲賊匪所割之稻四十餘石及
濕穀地瓜乾四百餘石散給兵民作為口食該處糧
餉火藥時有接濟雖至匱乏尚可儘力支持現在方
與普吉保約會夾攻而福康安統領大兵即日前進
聲勢壯盛正可乘銳進剿豈有數月以來該處縣城

俱能保守無虞而福康安未到十餘日之前柴大紀
轉不能設法捍衛竟至委城而去之理且常青在府
城駐守亦時有賊擾常青督兵堵禦屢有斬獲並未
稍涉惶急形諸奏牘可見常青雖係年老究經事較
多心有定見于剿捕事宜尚有把握此時大兵雲集
正在振作士氣尅期進剿之時乃恒瑞過于張皇率
為此奏若將士等為此言所惑以致心懷疑懼阻其
銳氣所關甚重福康安與恒瑞係屬親戚且福康安

于此事本不免稍存畏難之見恒瑞所言自尤易于
聽信而海蘭察及巴圖魯侍衛章京等大半與恒瑞
熟識若聞恒瑞之言俱不免心存猶豫稍懷恇怯何
以集事朕甚憂之著傳諭福康安務須堅持定見切
勿為恒瑞之言所惑昨因恒瑞連次奏到各摺尚有
料理是以諭令福康安到彼酌量如尚能得力不妨
將伊暫留該處効用今觀恒瑞所奏恇怯若此徒亂
人意伊雖年力尚壯而福康安現在所帶巴圖魯侍

衛章京及該處鎮將等勝于恒瑞者正不乏人恒瑞竟不必留于該處矣彼雖懇求軍營効力亦不可聽著福康安即令其來京候旨不可因係親戚稍存迴護掩之賊匪雖多不過一時烏合祇湏于初次打仗時將賊匪痛加殲戮一二次則賊首賊目望風胆落其餘附賊黨夥自必紛紛瓦解豈有必須一兵抵一賊之理即如現在各村庄民人具呈請領腰牌可見伊等皆知賊匪易于撲滅惟恐大兵一到難以別白

預為將來自全地步本係心持兩端若見官兵克捷
自無不堅心歸順協力助剿是賊黨雖多易聚易散
無難一舉蕩平何必以賊多兵少為慮若如恒瑞所
奏防守攻擊動須兵五六萬毋論無此辦法且隣近
省分俱已派撥多兵勢難再調其較遠省分即速行
續調行走動需時日亦已緩不濟急柴大紀處豈能
曠日持久待此援兵乎福康安此時竟當親統大
兵鼓勇直前接應普吉保一路不必以鹿仔港為慮鹿

仔港現有李化龍在彼駐守尚能保護無虞此時官軍四路雲集聲威百倍鹿仔港自更可無慮並著福康安預行知會普吉保一得進兵信息即先行帶兵直前奮剿速抵嘉義縣福康安亦即帶兵隨後策應如福康安因大兵行走不能迅速即將所帶巴圖魯侍衛章京等酌派數十人令其先往幫同普吉保奮力攻剿況普吉保後路即係福康安帶兵前進之路福康安統領如許勁將強兵接踵繼進于所過地方

遇有屯聚賊匪乘勢剿殺肅清道路正可聯絡一氣併力進攻且大兵所過村庄將賊匪殺散後其所積米糧即可以資兵食恒瑞所奏賊匪屢有增添之語想必係諸羅賊匪見普吉保恒瑞統領官兵密邇縣城賊匪聞風畏懼添集夥黨欲為抵禦我兵之計而恒瑞株守一隅見該處賊匪較多遂爾過甚其辭殊不知南北兩路兵氣已為振作賊匪漸有渙散之勢而福康安又統領生力新兵萬餘自當所向克捷貴

州湖南勁兵又當陸續將到斷可無湏再添兵力若
福康安到彼或以現在官兵尚覺不敷實有必須添
調之處則廣東及福建本省已諭令李侍堯孫士毅
廣行召募新兵預脩調用福康安即一面先行檄調
一面據實奏聞亦無不可從來行軍之道不在兵多
而在將兵得人豈有福康安同海蘭察及如許巴圖
魯侍衛章京將弁而不能掃穴擒渠之理乎福康安
惟當悉心籌畫勿為人言所惑

初六日已李侍堯奏言楊廷理等稟稱諸羅賊匪

因鹽水港笨港兩路援兵未進自初五日至初十日晝夜攻城兵民竭力抵禦十一日賊始退踞各庄仍前梗截道路現在城中糧藥俱盡勢甚危急若遲數日援兵不至實難力守等語是本月望前兩路兵尚未進發看來普吉保欲待恒瑞同進恒瑞又欲待鄭國卿到分兵駐鹽水港始行進兵是以彼此相待又稽時日鹽水港為水路要口現在

府城至諸羅之陸路久已不通惟恃此一港為進
兵一門戶萬一稍有疎虞更難辦理是恒瑞劄駐
鹽水港或實有未可輕動之勢至普吉保離諸羅
僅二十餘里所帶兵有五千餘名既聞諸羅甚急
應即奮勉殺入以解重圍乃必待恒瑞同進似不
免意存觀望臣前派往之三千兵內遊擊張元咎
先到之一千五百名兵已于初九日赴鹽水港而
鄭國卿帶領之一千五百名兵亦已放洋計此時

必當全到則恒瑞自可分兵駐鹽水港一面知會
普吉保兩路並進但未知諸羅兵力是否尚能堅
待又李永祺稟稱普吉保已移營月眉庄離諸羅
不過十餘里等語亦未知是否確實臣前據各官
九月中所稟似兵事大有轉機今據楊廷理所稟
情形則仍未得手數日之間奏報前後不符臣實
深惶悚焦急看來此事總須福康安到彼調度鼓
勵方能奏效奏入

上命軍機大臣傳諭福康安海蘭察李侍堯柴大紀曰
昨恒瑞奏到臺灣情形所慮賊多兵少之處殊不可
信恒瑞在鹽水港有兵五千據奏業經派一千四百
名駐守新店海口又派兵五百名駐守鹽水港是恒
瑞尚有兵一千餘名伊既知官兵後路亟須防範即
應酌量該處情形預行設計倘有賊匪潛出滋擾即
奮力堵其來路勦殺使賊匪無從逞其狡計如慮賊
匪分路統截即應預先知會柴大紀令帶兵出城跟

踪追殺内外夾擊並令梁朝桂前後策應隨時堵禦
自可無虞後顧何至一籌莫展徒事張皇即如從前
平定兩金川前後派調之兵共有十萬而此次剿捕
臺灣賊匪福建本省前後所調滿漢官兵已二萬有
餘粵省節次派調官兵又有一萬三四千名加以浙
江川黔粵西湖南等省陸續添調之兵又不下萬四
五千合之臺灣原有額設兵萬餘統計已幾及六萬
兵力實為厚集況金川係土司地方番衆久經生聚

且其地勢險隘礮卡林立而官兵深入攻剿直搗巢穴展拓疆宇隸我版圖彼時不過需兵十萬即克奏膚功今臺灣本屬內地逆匪林爽文等不過編戶細民糾衆倡亂一時蟻聚況泉州廣東義民皆屬急公効義較之平定金川難易奚啻倍蓰而恒瑞輒以賊多兵少張大其詞徒亂人意剿賊制勝之道全在主持之一心如能立志堅定胸有成筭則運籌決勝自當所尚無前將士等亦俱勇氣百倍若將兵之人先

不免心存猶豫中無把握即使增益多兵亦難望其
勇往得力福康安當堅持定見至紫大紀一路賊匪勢
尚猖獗該處屢經賊匪圍擾數月以來紫大紀激勵兵
民多方捍禦縣城保護無虞此時該處賊匪因見官
軍應接未至晝夜攻城雖勢在急迫但據李侍堯奏
探聞普吉保現已移營月眉庄離縣城不過十餘里
或普吉保已帶兵前進殺賊解圍亦未可定且紫大
紀固守縣城已經數月設遇縣城力不能守之時自

必遵照前旨帶兵出城非前赴恒瑞處即赴普吉保處仍可合併一路整軍再圖克復且縣城存貯糧餉火藥等項俱已用盡城內民人又俱隨出是該處止係空城即被賊匪一時搶佔無所資藉亦必旋即收復至普吉保一路現有兵五千餘名雖據李侍堯奏十月望前尚未向縣城進發自係普吉保因後路官兵不能接應未敢輕進今福康安已尅期進發普吉保處有大兵隨後接應倍當奮力進剿直抵縣城與

柴大紀裏外應合併力攻剿以期克捷不必以後路
為慮



欽定平定臺灣紀畧卷四十三